

Beberapa kawasan di Selangor alami gegaran

Oleh: ISMAIL DAUD

KLANG 26 Dis. - Beberapa kawasan di sekitar Klang, Shah Alam, Kuala Selangor, Tanjong Karang sehingga ke Sabak Bernam merasai gegaran antara pukul 8.45 pagi hingga 9.30 pagi ini akibat kejadian gempa bumi yang berlaku di Sumatera.

Gegaran yang dirasakan antara 15 saat sehingga kira-kira seminit menyebabkan beberapa penduduk terutama yang mendiami bangunan tinggi dan pangsapuri panik dan bergegas turun sebagai langkah keselamatan.

Gegaran turut dirasai di Hospital Tengku Ampuan Rahimah (HTAR) di sini tetapi tiada sebarang kecederaan atau kerosakan dilaporkan.

Ketua Balai Bomba Taman Sri Andalas, Raja Kudin Raja Ahmad berkata, pihaknya menerima panggilan dari HTAR pada kira-kira pukul 9.30 pagi dan telah bertindak menghantar sepasukan anggota untuk memeriksa bangunan hospital tersebut.

Menurutnya, gegaran di HTAR dirasakan selama hampir seminit dengan kesan gegaran itu paling kuat dirasai di tingkat lima dan ke atas, manakala jururawat di situ memberitahu air di sebuah akuarium di tingkat tujuh hospital itu berkocak semasa gegaran berlaku.

“Pihak bomba telah membuat pemeriksaan dan kami mendapati tidak terdapat cermin yang pecah, yang menjadi antara petunjuk utama jika berlaku kerosakan struktur tetapi pihak bomba telah meminta HTAR menghubungi Jabatan Kerja Raya (JKR) supaya pemeriksaan lebih rapi dibuat,” katanya di sini hari ini.

Katanya, semasa gegaran itu berlaku, tidak ada pesakit atau pelawat diarahkan turun tetapi orang ramai di tingkat bawah tidak dibenarkan naik sehingga pihaknya mengesahkan bangunan itu selamat.

Selain itu, kata beliau, pihaknya juga menerima panggilan dari penduduk pangsapuri di Taman Sentosa, pangsapuri Proton di Batu 4 dan juga dari penduduk Kampung Jawa.

Di Shah Alam, Penolong Penguasa Kanan Balai Bomba Shah Alam, Borhan Madun berkata, pihaknya kini diletakkan dalam keadaan bersiap sedia berikutan beberapa panggilan yang diterima dari penduduk pangsapuri di sekitar bandar raya itu.

Katanya, pihaknya menerima empat panggilan dengan panggilan pertama diterima pada pukul 9.28 pagi dari penduduk di pangsapuri Seksyen 19 di sini.

Bagaimanapun, katanya, setakat ini, tidak ada sebarang kerosakan dan kecederaan dilaporkan termasuk dari bangunan-bangunan kerajaan.

Sementara itu, Ketua Polis daerah Sabak Bernam, Supritendan Zainal Abidin Kassim berkata, gegaran turut dirasai di daerah itu selama kira-kira 15 saat tetapi tidak ada sebarang laporan kecederaan atau kerosakan dilaporkan.

Katanya, semasa gegaran itu, nelayan turut dapat menyaksikan kejadian ombak besar secara tiba-tiba selama kira-kira 10 saat sebelum keadaan menjadi seperti sedia kala.

Di Tanjong Karang, jurucakap bomba turut mengesahkan berlaku sedikit gegaran di sekitar kawasan tersebut selama kira-kira satu minit tetapi tidak ada sebarang kerosakan dilaporkan.

http://www.utusan.com.my/utusan/archive.asp?y=2004&dt=1227&pub=utusan_malaysia&sec=muka_hadapan&pg=mh_09.htm&arc=hive